

傷寒論

冊三

傷寒論十卷目錄

卷之一

辨脈法

平脈法

卷之二

傷寒例

辨瘡濕暍脈證

辨太陽病脈證并治上

卷之三

辨太陽病脈證并治中

卷之四

辨太陽病脈證并治下

卷之五

辨陽明病脈證并治

辨少陽病脈證并治

卷之六

辨太陰病脈證并治

辨少陰病脈證并治

辨厥陰病脈證并治

卷之七

辨霍亂病脈證并治

辨陰陽易差病脈證并治

辨不可發汗病脈證并治

辨可發汗病脈證并治

卷之八

辨發汗後病脈證并治

辨不可吐

辨可吐

卷之九

辨不可下病脈證并治

辨可下病脈證并治

卷之十

辨發汗吐下後病脈證并治

傷寒論目錄

傷寒論藥方目錄

卷第一

無方

卷第二

方六道

桂枝湯

桂枝二越婢一湯

甘草乾薑湯

芍藥甘草湯

調胃承氣湯

四逆湯

卷第三

方二十七道

葛根湯

葛根芩黃連湯

麻黃湯

大青龍湯

小青龍湯

乾薑附子湯

麻黃杏仁甘草石膏湯

桂枝甘草湯

茯苓桂枝甘草大棗湯

厚朴生薑半夏甘草人參湯

茯苓桂枝白朮甘草湯

芍藥甘草附子湯

茯苓四逆湯

五苓散

茯苓甘草湯

梔子豉湯

梔子厚朴湯

梔子乾薑湯

小柴胡湯

小建中湯

大柴胡湯

桃核承氣湯

柴胡加龍骨牡蠣湯

救逆湯

桂枝甘草龍骨牡蠣湯

抵當湯

抵當丸

卷第四

方一十九道

大陷胸丸

大陷胸湯

小陷胸湯

文蛤散

白散

柴胡桂枝乾薑湯

半夏瀉心湯

十棗湯

大黃黃連瀉心湯

赤石脂禹餘糧湯

旋伏代赭石湯

桂枝人參湯

瓜蒂散

黃芩湯

黃連湯

桂枝附子湯

甘草附子湯

白虎湯

炙甘草湯

卷第五

方十道

大承氣湯

小承氣湯

猪苓湯

蜜煎導方

猪膽汁方

茵陳蒿湯

吳茱萸湯

麻仁丸

梔子蘖皮湯

麻黃連軺赤小豆湯

卷第六

方二十道

麻黃附子細辛湯

麻黃附子甘草湯

黃連阿膠湯

附子湯

桃花湯

豬膚湯

甘草湯

桔梗湯

苦酒湯

半夏散及湯

白通湯

白通加猪膽汁湯

真武湯

通脈四逆湯

四逆散

烏梅丸

當歸四逆湯

麻黃升麻湯

乾薑黃芩黃連人參湯

白頭翁湯

卷第七

方五道

理中丸

理中湯附

燒裯散

枳實梔子湯

牡蠣澤瀉散

竹葉石膏湯

卷第八

無方

卷第九

無方

卷第十

無方

此下二十五方雖於隨證下有之緣多以加減爲文似未詳備故復載方在末卷

桂枝加葛根湯

桂枝加厚朴杏子湯

桂枝加附子湯

尤附湯附

桂枝去芍藥湯

桂枝去芍藥加附子湯

桂枝麻黃各半湯

桂枝二麻黃一湯

白虎加人參湯

桂枝去桂加茯苓白朮湯

葛根加半夏湯

桂枝加芍藥生薑人參新加湯

梔子甘草豉湯

梔子生薑豉湯

柴胡加芒硝湯

桂枝加桂湯

柴胡桂枝湯

附子瀉心湯

生薑瀉心湯

甘草瀉心湯

黃芩加半夏生薑湯

桂枝加大黃湯

桂枝加芍藥湯

四逆加吳茱萸生薑湯

四逆加人參湯

四逆加猪膽汁湯

已上十卷內計方一百一十二道

此經方劑並按古法鎰銖分兩與今不同謂如㕮咀者卽今之剉如麻豆大是也云一升者卽今之大白盞也云銖者六銖爲一分卽二錢半也二十四銖爲一兩也云三兩者卽今之一兩云二兩卽今之六錢半也料例大者只合三分之一足矣

傷寒論藥方目錄

珍倣宋版印

註解傷寒論卷第四

漢張仲景著

晉王叔和撰次

宋成無巳註

辨太陽脈證并治下第七

明汪濟甫校正

問曰病有結胸有藏結其狀何如答曰按之痛寸脈浮關脈沉名曰結胸也何謂藏結答曰如結胸狀飲食如故時時下利寸脈浮關脈小細沉緊名曰藏結舌上白胎滑者難治

結胸者邪結在胸藏結者邪結在藏二者皆下後邪氣乘虛入裏所致下後邪氣入裏與陽相結者爲結胸以陽受氣於胸中故爾與陰相結者爲藏結以陰受之則入五藏故爾氣宜通而塞故痛邪結陽分則陰氣不得上通邪結陰分則陽氣不得

下通是二者皆心下鞭痛寸脈浮關脈沉知邪結
在陽也寸脈浮關脈小細沉緊知邪結在陰也陰
結而陽不結雖心下結痛飲食亦自如故陰氣乘
腸虛而下故時時自下利陰得陽則解藏結得熱
證多則易治舌上白胎滑者邪氣結胸中亦寒故
云難治

藏結無陽證不往來寒熱其人反靜舌上胎滑者不
可攻也

藏結於法當下無陽證爲表無熱不往來寒熱爲
半表半裏無熱其人反靜爲裏無熱經曰舌上如
胎者以丹田有熱胸中有寒以表裏皆寒故不可
攻

病發於陽而反下之熱入因作結胸病發於陰而反

下之因作痞所以成結胸者以下之太早故也
發熱惡寒者發於陽也而反下之則表中陽邪入
裏結於胸中爲結胸無熱惡寒者發於陰也而反
下之表中陰邪入裏結於心下爲痞

結胸者項亦強如柔痓狀下之則和宜大陷胸丸方
結胸病項強者爲邪結胸中胸膈結滿心下緊實
但能仰而不能俛是項強亦如柔痓之狀也與大
陷胸丸下結泄滿

大陷胸丸方

大黃

半斤味苦寒

葶苈

半升味苦寒熬

芒硝

半升味鹹寒

杏仁

半升味苦甘溫去皮尖熬

大黃芒硝之苦鹹所以下熱葶苈杏仁之苦甘所
以泄滿甘遂取其直達白蜜取其潤利皆以下泄

滿實物也

右四味搗篩二味內杏人芒硝合研如脂和散取如彈丸一枚別搗甘遂末壹錢七白蜜二合水二升煮取一升溫頓服之一宿乃下如不下更服取下爲效禁如藥法

結胸證其脈浮大者不可下下之則死

結胸爲邪結胸中屬上焦之分得寸脈浮關脈沉者爲在裏則可下若脈浮大心下雖結是在表者猶多未全結也下之重虛邪氣復結則難可制故云下之則死

結胸證悉具煩燥者亦死

結胸證悉具邪結已深也煩燥者正氣散亂也邪氣勝正病者必死

太陽病脈浮而動數浮則爲風數則爲熱動則爲痛
數則爲虛頭痛發熱微盜汗出而反惡寒者表未解
也醫反下之動數變遲膈內拒痛胃中空虛客氣動
膈短氣躁煩心中懊憹陽氣內陷心下因鞭則爲結
胸大陷胸湯主之若不結胸但頭汗出餘無汗劑頸
而還小便不利身必發黃也

動數皆陽脈也當責邪在表睡而汗出者謂之盜
汗爲邪氣在半表半裏則不惡寒此頭痛發熱微
盜汗出反惡寒者表未解也當發其汗醫反下之
虛其胃氣表邪乘虛則陷邪在表則見陽脈邪在
裏則見陰脈邪氣內陷動數之脈所以變遲而浮
脈獨不變者以邪結胸中上焦陽結脈不得而沉
也客氣者外邪乘胃中空虛入裏結於胸膈膈中

拒痛者客氣動膈也金匱要略曰短氣不足以息者實也短氣燥煩心中懊憹皆邪熱爲實陽氣內陷氣不得通於膈壅於心下爲鞭滿而痛成結胸也與大陷胸湯以下結熱若胃中空虛陽氣內陷不結於胸膈下入於胃中者遍身汗出則爲熱越不能發黃若但頭汗出身無汗劑頸而還小便不利者熱不得越必發黃也

大陷胸湯方

大黃

六兩去皮苦寒

芒硝

一升鹹寒

甘遂

一錢苦寒

大黃謂之將軍以苦蕩滌芒硝一名硝石以其鹹能煎鞭夫間有甘遂以通水也甘遂若夫間之遂其氣可以直達透結陷胸三物爲允

右三味以水六升先煮大黃取二升去滓內芒硝煮

一兩沸內甘遂末溫服一升得快利止後服

傷寒六七日結胸熱實脈沉而緊心下痛按之石鞭者大陷胸湯主之

病在表而下之熱入因作結胸此不云下後而云
傷寒六七日則是傳裏之實熱也沉爲在裏緊爲
裏實以心下痛按之實鞭是以爲結胸與大陷胸
湯以下結熱

傷寒十餘日熱結在裏復往來寒熱者與大柴胡湯
但結胸無大熱者此爲水結在胸脅也但頭微汗出
者大陷胸湯主之

傷寒十餘日熱結在裏是可下之證復往來寒熱
爲正邪分爭未全斂結與大柴胡湯下之但結胸
無大熱者非熱結也是水飲結於胸脅謂之水結

胸周身汗出者是水飲外散則愈若但頭微汗出
餘處無汗是水飲不得外泄停畜而不行也與大
陷胸湯以逐其水

太陽病重發汗而復下之不大便五六日舌上燥而
渴日晡所小有潮熱從心下至少腹鞭滿而痛不可
近者大陷胸湯主之

重發汗而復下之則內外重亡津液而邪熱內結
致不大便五六日舌上燥而渴也日晡潮熱者屬
胃此日晡小有潮熱非但在胃從心下至少腹鞭
滿而痛不可近者是一腹之中上下邪氣俱甚也
與大陷胸湯以下其邪

小結胸病正在心下按之則痛脈浮滑者小陷胸湯
主之

心下鞭痛手不可近者結胸也正在心下按之則
痛是熱氣猶淺謂之小結胸結胸脈沉緊或寸浮
關沈今脈浮滑知熱未深結與小陷胸湯以除胸
膈上結熱也

小陷胸湯方

黃連一兩

苦寒

半夏半升

溫洗

括蔞實大者一箇

味苦寒

苦以泄之辛以散之黃連括蔞實苦寒以泄熱半
夏之辛以散結

右三味以水六升先煮括蔞取三升去滓內諸藥煮
取二升去滓分溫三服

太陽病二三日不能臥但欲起心下必結脈微弱者
此本有寒分也反下之若利止必作結胸未止者四
日復下之此作協熱利也

太陽病二三日邪在表也不能臥但欲起心下必
結者以心下結滿臥則氣壅而愈甚故不能臥而
但欲起也心下結滿有水分有寒分有氣分今脈
微弱知本有寒分醫見心下結而反下之則太陽
表邪乘虛入裏利止則邪氣留結爲結脅利不止
至次日復如前下利不止者是邪熱下攻腸胃爲
挾熱利也

太陽病下之其脈促不結胸者此爲欲解也脈浮者
必結胸也脈緊者必咽痛脈弦者必兩脅拘急脈細
數者頭痛未止脈沈緊者必欲嘔脈沈滑者協熱利
脈浮滑者必下血

此太陽病下之後邪氣傳變其脈促者爲陽盛下
後脈促爲陽勝陰也故不作結胸爲欲解下後脈

浮爲上焦陽邪結而爲結胸也經曰結胸者寸脈浮關脈沈下後脈緊則太陽之邪傳於少陰經曰脈緊者屬少陰內經曰邪客於少陰之絡令人咽痛不可內食所以脈緊者必咽痛脈弦則太陽之邪傳於少陽經曰尺寸俱弦者少陽受病也其脈循脅絡於耳所以脈弦者必兩脅拘急下後邪氣傳裏則頭痛當止脈細數爲邪未傳裏而傷氣也細爲氣少數爲在表故頭痛未止脈沈緊則太陽之邪傳於陽明爲裏實也沉爲在裏緊爲裏實陽明裏實故必欲嘔脈滑則太陽之邪傳於腸胃以滑爲陰氣有餘知邪氣入裏干於下焦也沉爲血勝氣虛是爲協熱利浮爲氣勝血虛是知必下血經曰不宜下而便攻之諸變不可勝數此之謂也

病在陽應以汗解之反以冷水澆之若灌之其熱被却不得去彌更益煩肉上粟起意欲飲水反不渴者服文蛤散若不差者與五苓散寒實結胸無熱證者與三物小陷胸湯白散亦可服

病在陽爲邪在表也法當汗出而解反以冷水澆之灌洗熱被寒水外不得出則反攻其裏彌更益煩肉上粟起者水寒之氣客於皮膚也意欲飲水者裏有熱也反不渴者寒在表也與文蛤散以散表中水寒之氣若不差是水熱相搏欲傳於裏與五苓散發汗以和之始熱在表因水寒制之不得外泄內攻於裏結於胸膈心下鞭痛本是水寒伏熱爲實故謂之寒實結胸無熱證者外無熱而熱悉收斂於裏也與小陷胸湯以下逐之白散下熱

故亦可攻

文蛤散方

文蛤

五味
鹹寒

鹹走腎邪可以勝水氣

右一味爲散以沸湯和一錢匕服湯用五合

白散方

桔梗

三分苦味辛
微溫

芭豆

一分黑研去皮心熬
研如脂平溫

貝母

三分辛苦
平味

辛散而苦泄桔梗貝母之苦辛用以下氣芭豆之辛用以散實

右件三味爲末內芭豆更於臼中杵之以白飲和服強人半錢羸者減之病在膈上必吐在膈下必利不利進熱粥一杯利過不止進冷粥一杯身熱皮粟不

解欲引衣自覆者若水以澣之洗之益令熱却不得出當汗而不汗則煩假令汗出已腹中痛與芍藥三兩如上法

太陽與少陽併病頭項強痛或眩冒時如結胸心下痞鞭者當刺大椎第一間肺俞肝俞慎不可發汗發汗則讞語脈弦五六日讞語不止當刺期門

太陽之脈絡頭下頃頭項強痛者太陽表病也少陽之脈循胸絡脇如結胸心下痞鞭者少陽裏病也太陽少陽相併爲病不純在表故頭項不但強痛而或眩冒亦未全入裏故時如結胸心下痞鞭此邪在半表半裏之間也刺大椎第一間肺俞以瀉太陽之邪刺肝俞以瀉少陽之邪邪在表則可發汗邪在半表半裏則不可發汗發汗則亡津液

損動胃氣少陽之邪因干於胃土爲木刑必發讞語脈弦至五六日傳經盡邪熱去而讞語當止若復不止爲少陽邪熱甚也刺期門以瀉肝膽之氣婦人中風發熱惡寒經水適來得之七八日熱除而脈遲身涼胸脇下滿如結胸狀讞語者此爲熱入血室也當刺期門隨其實而瀉之

中風發熱惡寒表病也若經水不來表邪傳裏則入府而不入血室也因經水適來血室空虛至七八日邪氣傳裏之時更不入府乘虛而入於血室熱除脈遲身涼者邪氣內陷而表證罷也胸脇下滿如結胸狀讞語者熱入血室而裏實期門者肝之募肝主血刺期門者瀉血室之熱審看何經氣實更隨其實而瀉之

婦人中風七八日續得寒熱發作有時經水適斷者此爲熱入血室其血必結故使如瘧狀發作有時小柴胡湯主之

中風七八日邪氣傳裏之時本無寒熱而續得寒熱經水適斷者此爲表邪乘血室虛入於血室與血相搏而血結不行經水所以斷也血氣與邪分爭致寒熱如瘧而發作有時與小柴胡湯以解傳經之邪

婦人傷寒發熱經水適來晝日明了暮則譏語如見鬼狀者此爲熱入血室無犯胃氣及上二焦必自愈傷寒發熱者寒已成熱也經水適來則血室虛空邪熱乘虛入於血室若晝日譏語爲邪客於府而陽爭也此晝日明了暮則譏語如見鬼狀是邪不

入府入於血室而陰爭也陽盛讞語則宜下此熱
入血室不可與下藥犯其胃氣熱入血室血結實
熱者與小柴胡湯散邪發汗此雖熱入血室而不
留結不可與發汗藥犯其上焦熱入血室胸脅滿
如結胸狀者可刺期門此雖熱入血室而無滿結
不可刺期門犯其中焦必自愈者以經行則熱隨
血去血下也已則邪熱悉除而愈矣所爲發汗爲
犯上焦者發汗則動衛氣衛氣出上焦故也刺期
門爲犯中焦者刺期門則動榮氣榮氣出中焦故
也脈經曰無犯胃氣及上二焦必自愈豈謂藥不
謂針耶

傷寒六七日發熱微惡寒支節煩疼微嘔心下支結
外證未去者柴胡加桂枝湯主之

傷寒六七日邪當傳裏之時支散也嘔而心下結者裏證也法當攻裏發熱微惡寒支節煩疼爲外證未去不可攻裏與柴胡桂枝湯以和解之

傷寒五六日已發汗而復下之胸脅滿微結小便不利渴而不嘔但頭汗出往來寒熱心煩者此爲未解也柴胡桂枝乾薑湯主之

傷寒五六日已經汗下之後則邪當解今胸脅滿微結小便不利渴而不嘔但頭汗出往來寒熱心煩者卽邪氣猶在半表半裏之間爲未解也胸脅滿微結寒熱心煩者邪在半表半裏之間也小便不利而渴者汗下後亡津液內燥也若熱消津液令小便不利而渴者其人必嘔今渴而不嘔知非裏熱也傷寒汗出則和今但頭汗出而餘處無汗

者津液不足而陽虛於上也與柴胡桂枝乾薑湯以解表裏之邪復津液而助陽也

柴胡桂枝乾薑湯方

柴胡半斤
苦平

四兩

寒

桂枝三兩
辛熱
去皮

三兩

熱

乾薑三兩
辛熱

三兩

熱

括薑根四兩
苦寒

二兩

寒

黃芩三兩
苦寒

三兩

寒

牡蠣三兩
鹹寒

三兩

熱

甘草二兩
味甘
平

二兩

寒

生津液

內經曰熱淫於內以苦發之柴胡黃芩之苦以解傳表之邪辛甘發散爲陽桂枝甘草之辛甘以散在表之邪鹹以煎之牡蠣之鹹以消胸脅之滿辛以潤之乾薑之辛以固陽虛之汗津液不足而爲渴苦以堅之括薑之苦以生津液

右七味以水一斗二升煮取六升去滓再煎取三升溫服一升日三服初服微煩復服汗出便愈

傷寒五六日頭汗出微惡寒手足冷心下滿口不欲食大便鞭脈細者此爲陽微結必有表復有裏也脈沉亦在裏也汗出爲陽微假令純陰結不得復有外證悉入在裏此爲半在裏半在外也脈雖沉緊不得爲少陰病所以然者陰不得有汗今頭汗出故知非少陰也可與小柴胡湯設不了了者得屎而解

傷寒五六日邪當傳裏之時頭汗出微惡寒者表仍未解也手足冷心下滿口不欲食大便鞭脈細者邪結於裏也大便鞭爲陽結此邪熱雖傳於裏然以外帶表邪則熱結猶淺故曰陽微結脈沉雖爲在裏若純陰結則更無頭汗惡寒之表證諸陰脈皆至頸胸中而還不上循頭今頭汗出知非少陰也與小柴胡湯以除半表半裏之邪服湯已外

證罷而不了了者爲裏熱未除與湯取其微利則愈故云得屎而解

傷寒五六日嘔而發熱者柴胡湯證具而以他藥下之柴胡證仍在者復與柴胡湯此雖已下之不爲逆必蒸蒸而振却發熱汗出而解若心下滿而鞭痛者此爲結胸也大陷胸湯主之但滿而不痛者此爲痞柴胡不中與之宜半夏瀉心湯

傷寒五六日邪在半表半裏之時嘔而發熱邪在半表半裏之證是爲柴胡證具以他藥下之柴胡證不罷者不爲逆却與柴胡湯則愈若下後邪氣傳裏者邪在半表半裏則陰陽俱有邪至於下後邪氣傳裏亦有陰陽之異若下後陽邪傳裏者則結於胸中爲結胸以胸中爲陽受氣之分與大陷

珍藏宋版印
胸湯以下其結陰邪傳裏者則留於心下爲痞以
心下爲陰受氣之分與半夏瀉心湯以通其痞經
曰病發於陽而反下之熱入因作結胸病發於陰
而反下之因作痞此之謂也

半夏瀉心湯方

半夏

半升
辛平
洗

黃芩

苦寒

乾薑

辛熱

人參

配甘溫各三

黃連

苦寒一兩

大棗

擘二十枚

甘草

三兩
甘平
炙

辛入肺而散氣半夏之辛以散結氣苦入心而泄
熱黃芩黃連之苦以瀉痞熱脾欲緩急食甘以緩
之人參甘草大棗之甘以緩之

右七味以水一斗煮取六升去滓再煮取三升溫服
一升日三服

太陽少陽併病而反下之成結胸心下鞭下利不止

水漿不下其人心煩

太陽少陽併病爲邪氣在半表半裏也而反下之二經之邪乘虛而入太陽表邪入裏結於胸中爲結胸心下鞭少陽裏邪乘虛下干腸胃遂利不止若邪結陰分則飲食如故而爲藏結此爲陽邪內結故水漿不下而心煩

脈浮而緊而復下之緊反入裏則作痞按之自濡但氣痞耳

浮而緊浮爲傷陽緊爲傷陰當發其汗而反下之若浮入裏爲陽邪入裏則作結胸浮不入裏而緊入裏者陰邪入裏則作痞

太陽中風下利嘔逆表解者乃可攻之其人糲糲汗

出發作有時頭痛心下痞鞭滿引脅下痛乾嘔短氣
汗出不惡寒者此表解裏未和也十棗湯主之

下利嘔逆裏受邪也邪在裏者可下亦須待表解
者乃可攻之其人繫繫汗出發作有時不惡寒者
表已解也頭痛心下痞鞭滿引脅下痛乾嘔短氣
者邪熱內畜而有伏飲是裏未和也與十棗湯下
熱逐飲

十棗湯方

芫花

辛味
苦寒

甘遂

苦寒

大戟

苦寒

大棗

甘溫
枚擘

辛以散之芫花之辛以散飲苦以泄之甘遂大戟
之苦以泄水水者腎所主也甘者脾之味也大棗
之甘者益土而勝水

右上三味等分各別搗爲散以水一升半先煮大棗肥者十枚取八合去滓內藥末強人服一錢七羸人服半錢溫服之平旦服若下少病不除者明日更服加半錢得快下利後糜粥自養

太陽病醫發汗遂發熱惡寒因復下之心下痞表裏俱虛陰陽氣並竭無陽則陰獨復加燒針因胸煩面色青黃膚瞞者難治今色微黃手足溫者易愈

太陽病因發汗遂發熱惡寒者外虛陽氣邪復不除也因復下之又虛其裏表中虛邪內陷傳於心下爲痞發汗表虛爲竭陽下之裏虛爲竭陰表證罷爲無陽裏有痞爲陰獨又加燒針虛不勝火火氣內攻致胸煩也傷寒之病以陽爲主其人面色

青膚肉瞞動者陽氣大虛故云難治若面色微黃

手足溫者卽陽氣得復故云易愈

心下痞按之濡其脈關上浮者大黃黃連瀉心湯主之

心下鞭按之痛關脈沉者實熱也心下痞按之濡其脈關上浮者虛熱也大黃黃連湯以導其虛熱大黃黃連瀉心湯方

大黃

二兩
苦寒

黃連

一兩
苦寒

內經曰火熱受邪心病生焉苦入心寒除熱大黃黃連之苦寒以導瀉心下之虛熱但以麻沸湯瀉服者取其氣薄而泄虛熱

右二味以麻沸湯二升瀉之須臾絞去滓分溫再服心下痞而復惡寒汗出者附子瀉心湯主之心下痞者虛熱內伏也惡寒汗出者陽氣外虛也

與瀉心湯攻痞加附子以固陽

本以下之故心下痞與瀉心湯痞不解其人渴而口燥煩小便不利者五苓散主之

本因下後成痞當與瀉心湯除之若服之痞不解其人渴而口燥煩小便不利者爲水飲內畜津液不行非熱痞也與五苓散發汗散水則愈一方忍之一日乃愈者不飲水者外水不入所停之水得行而痞亦愈也

傷寒汗出解之後胃中不和心下痞鞭乾噫食臭脅下有水氣腹中雷鳴下利者生薑瀉心湯主之

胃爲津液之主陽氣之根大汗出後外亡津液胃中空虛客氣上逆心下痞鞭金匱要略曰中焦氣未和不能消穀故令噫乾噫食臭者胃虛而不殺

穀也脅下有水氣腹中雷鳴土弱不能勝水也與瀉心湯以攻痞加生薑以益胃

傷寒中風醫反下之其人下利日數十行穀不化腹中雷鳴心下痞鞭而滿乾嘔心煩不得安醫見心下痞謂病不盡復下之其痞益甚此非結熱但以胃中虛客氣上逆故使鞭也甘草瀉心湯主之

傷寒中風是傷寒或中風也邪氣在表醫反下之虛其腸胃而氣內陷也下利日數十行穀不化腹中雷鳴者下後裏虛胃弱也心下痞鞭乾嘔心煩不得安者胃中空虛客氣上逆也與瀉心湯以攻表加甘草以補虛前以汗後胃虛是外傷陽氣故加生薑此以下後胃虛是內損陰氣故加甘草傷寒服湯藥下利不止心下痞鞭服瀉心湯已復以

他藥下之利不止醫以理中與之利益甚理中者理
中焦此利在下焦赤石脂禹餘糧湯主之復利不止
者當利其小便

傷寒服湯藥下後利不止而心下痞鞭者氣虛而
客氣上逆也與瀉心湯攻之則痞已醫復以他藥
下之又虛其裏致利不止也理中丸脾胃虛寒下
利者服之愈此以下焦虛故與之其利益甚聖濟
經曰滑則氣脫欲其收也如開腸洞泄便溺遺失
澁劑所以收之此利由下焦不約與赤石脂禹餘
糧湯以澁洞泄下焦主分清濁下利者水穀不分
也若服澁劑而利不止當利小便以分其氣

赤石脂禹餘糧湯方

赤石脂一斤碎味甘溫

禹餘糧一斤平味甘平

本草云滻可去脫石脂之滻以收斂之重可去怯
餘糧之重以鎮固

已上二味以水六升煮取二升去滓三服

傷寒吐下後發汗虛煩脈甚微八九日心下痞鞕脅
下痛氣上衝咽喉眩冒經脈動惕者久而成痿

傷寒吐下後發汗則表裏之氣俱虛虛煩脈甚微
爲正氣內虛邪氣獨在至七八日正氣當復邪氣
當罷而心下痞脅下痛氣上衝咽喉眩冒者正氣
內虛而不復邪氣留結而不去經脈動惕者經絡
之氣虛極久則熱氣還經必成痿弱

傷寒發汗若吐若下解後心下痞鞕噫氣不除者旋
復代赭石湯主之

大邪雖解以曾發汗吐下胃氣弱而未和虛氣上

逆故心下痞鞭噫氣不除與旋復代赭石湯降虛氣而和胃

旋復代赭石湯方

旋復花

三兩味鹹溫

人參

二兩味甘溫

生薑

五兩切味辛溫

半夏

半升味辛溫

代赭石

三兩味苦寒

大棗

十二枚擘甘溫

甘草

三兩味甘平

鞭則氣堅鹹味可以炙之旋復之鹹以炙痞鞭虛則氣浮重劑可以鎮之代赭石之重以鎮虛逆辛者散也生薑半夏之辛以散虛痞甘者緩也人參甘草大棗之甘以補胃弱

右件七味以水一斗煮取六升去滓再煎取三升溫服一升日三服

下後不可更行桂枝湯若汗出而喘無大熱者可與

麻黃杏子甘草石膏湯

前第三卷十六證云發汗後不可更行桂枝湯汗出而喘無大熱者爲與此證治法同汗下雖殊既不當損正氣則一邪氣所傳既同遂用一法治之經所謂若發汗若下若吐後是矣

太陽病外證未除而數下之遂協熱而利利下不止心下痞鞭表裏不解者桂枝人參湯主之

外證未除而數下之爲重虛其裏邪熱乘虛而入裏虛協熱遂利不止而心下痞若表解而下利心下痞者可與瀉心湯若不下利表不解而心下痞者可先解表而後攻痞以表裏不解故與桂枝人參湯和裏解表

桂枝人參湯方

桂枝

四兩去皮
味辛熱

甘草

四兩炙
味甘平

白朮

三兩
味甘平

人參

三兩
味甘溫

乾薑

三兩
味辛熱

表未解者辛以散之裏不足者甘以緩之此以裏氣大虛表裏不解故加桂枝甘草於理中湯也右伍味以水九升先煮四味取五升內桂更煮取三升溫服一升日再夜一服

傷寒大下後復發汗心下痞惡寒者表未解也不可攻痞當先解表表解乃可攻痞解表宜桂枝湯攻痞宜大黃黃連瀉心湯

大下後復發汗則表裏之邪當悉已此心下爲痞惡寒者表裏之邪俱不解也因表不解而下之爲心下痞先與桂枝湯解表表解乃與大黃黃連瀉

心湯攻痞內經曰從外之內而盛於內者先治其

外而後調其內

珍倣宋版印

傷寒發熱汗出不解心中痞鞶嘔吐而下利者大柴胡湯主之

傷寒發熱寒已成熱也汗出不解表和而裏病也
吐利心腹濡軟爲裏虛嘔吐而下利心腹痞鞶者
是裏實也與大柴胡湯以下裏熱

病如桂枝證頭不痛項不強寸脈微浮胸中痞鞶氣
上衝咽喉不得息者此爲胸有寒也當吐之宜瓜蒂散

病如桂枝證爲發熱汗出惡風言邪在表也頭痛
項強爲桂枝湯證具若頭不痛項不強則邪不在
表而傳裏也浮爲在表沉爲在裏今寸脈微浮則
邪不在表亦不在裏而在胸中也胸中與表相應

故知邪在胸中者猶如桂枝證而寸脈微浮也以
胸中痞鞭上衝咽喉不得息知寒邪客於胸中而
不在表也千金曰氣浮上部填塞心胸胸中滿者
吐之則愈與瓜蒂散以吐胸中之邪

瓜蒂散方

瓜蒂一
味苦
寒黃赤小豆一分
酸溫
味

其高者越之越以瓜蒂豆豉之苦在上者湧之湧
以赤小豆之酸內經曰酸苦湧泄爲陰

右二味各別搗篩爲散已合治之取一錢七以香豉
一合用熱湯七合煮作稀糜去滓取汁和散溫頓服
之不吐者少少加得快吐乃止諸亡血虛家不可與

瓜蒂散

病脅下素有痞連在臍傍痛引少腹入陰筋者此名

藏結死

素有宿昔之積結於脅下爲痞今因傷寒邪氣入
裏與宿積相助使藏之真氣結而不通致連在臍
傍痛引少腹入陰筋而死

傷寒病若吐若下後七八日不解熱結在裏表裏俱
熱時時惡風大渴舌上乾燥而煩欲飲水數升者白
虎加人參湯主之

若吐若下後七八日則當解復不解而熱結在裏
表熱者身熱也裏熱者內熱也本因吐下後邪氣
乘虛內陷爲結熱若無表熱而純爲裏熱則邪熱
結而爲實此以表熱未罷時時惡風若邪氣純在
表則惡風無時若邪氣純在裏則更不惡風以時
時惡風知表裏俱有熱也邪熱結而爲實者則無

大渴邪熱散漫則渴今雖熱結在裏表裏俱熱未
爲結實邪氣散漫熏蒸焦膈故大渴舌上乾燥而
煩欲飲水數升與白虎加人參湯散熱生津
傷寒無大熱口燥渴心煩背微惡寒者白虎加人參
湯主之

無大熱者爲身無大熱也口燥渴心煩者當作陽
明病然以背微惡寒爲表未全罷所以屬大陽也
背爲陽背惡寒口中和者少陰病也當與附子湯
今口燥而渴背雖惡寒此裏熱也則惡寒亦不至
甚故云微惡寒與白虎湯和表散熱加人參止渴
生津

傷寒脈浮發熱無汗其表不解者不可與白虎湯渴
欲飲水無表證者白虎加人參湯主之

傷寒脈浮發熱無汗其表不解不渴者宜麻黃湯渴者宜五苓散非白虎所宜大渴欲水無表證者乃可與白虎加人參湯以散裏熱臨病之工大宜精別

太陽少陽併病心下鞭頸項強而眩者當刺大椎肺俞肝俞慎勿下之

心下痞鞭而強者少陽也頸項強者太陽也刺大椎肺俞以瀉太陽之邪以太陽脈下項俠脊故灸肝俞以瀉少陽之邪以膽爲肝之府故灸太陽爲在表少陽爲在裏卽是半表半裏證前第五證云不可發汗發汗則讞語是發汗攻太陽之邪少陽之邪益甚干胃必發讞語此云慎勿下之攻少陽之邪太陽之邪乘虛入裏必作結胸經曰太陽少

陽併病而反下之成結胸

太陽與少陽合病自下利者與黃芩湯若嘔者黃芩加半夏生薑湯主之

太陽陽明合病自下利爲在表當與葛根湯發汗陽明少陽合病自下利爲在裏可與承氣湯下之此太陽少陽合病自下利爲在半表半裏非汗下所宜故與黃芩湯以和解半表半裏之邪嘔者胃氣逆也故加半夏生薑以散逆氣

黃芩湯方

黃芩

三兩
苦寒
味

甘草

二兩
甘平
味

芍藥

二兩
酸平
味

大棗

十枚
甘溫
味

虛而不實者苦以堅之酸以收之黃芩芍藥之苦酸以堅斂腸胃之氣弱而不足者甘以補之甘草

大棗之甘以補固腸胃之弱

右四味以水一斗煮取三升去滓溫服一升日再夜
一服若嘔者加半夏半升生薑三兩

傷寒胸中有熱胃中有邪氣腹中痛欲嘔吐者黃連
湯主之

濕家下後舌上如胎者以丹田有熱胸中有寒是
邪氣入裏而爲下熱上寒也此傷寒邪氣傳裏而
爲下寒上熱也胃中有邪氣使陰陽不交陰不得
升而獨治於下爲下寒腹中痛陽不得降而獨治
於上爲胸中熱欲嘔吐與黃連湯升降陰陽之氣

黃連湯方

黃連

味苦寒

甘草

炙平味

乾薑

味辛熱

桂枝

去皮味辛熱各三兩

人參

味甘溫

半夏

味半升洗辛溫

大棗

味甘

性溫

擘

上熱者泄之以苦黃連之苦以降陽下寒者散之
以辛桂薑半夏之辛以升陰脾欲緩急食甘以緩
之人參甘草大棗之甘以益胃

右七味以水一斗煮取六升去滓溫服一升日三服
夜二服

傷寒八九日風濕相搏身體疼煩不能自轉側不嘔
不渴脈浮虛而濇者桂枝附子湯主之

傷寒與中風家至七八日再經之時則邪氣多在
裏身必不苦疼痛今日數多復身體疼煩不能自
轉側者風濕相搏也煩者風也身疼不能自轉側
者濕也經曰風則浮虛脈經曰脈來濇者爲病寒
濕也不嘔不渴裏無邪也脈得浮虛而濇身有疼

煩知風濕但在經也與桂枝附子湯以散表中風
濕

若其人大便鞭小便自利者去桂枝加白朮湯主之
桂發汗走津液此小便利大便鞭爲津液不足去
桂加朮

桂枝附子湯方

桂枝四兩味辛熱去皮

附子三枚破八片炮去皮

生薑三兩辛溫切

甘草二兩味甘溫炙

大棗十枚味甘溫

擘

風在表者散以桂枝甘草之辛甘濕在經者逐以
附子之辛熱薑棗辛甘行榮衛通津液以和表也
右五味以水六升煮取二升去滓分溫三服

風濕相搏骨節煩疼掣痛不得屈伸近之則痛劇汗
出短氣小便不利惡風不欲去衣或身微腫者甘草

附子湯主之

風則傷衛濕流關節風濕相搏兩邪亂經故骨節
疼煩掣痛不得屈伸近之則痛劇也風勝則衛氣
不固汗出短氣惡風不欲去衣爲風在表濕勝則
水氣不行小便不利或身微腫爲濕外薄也與甘
草附子湯散濕固衛氣

甘草附子湯方

甘草

二兩炙味甘平

附子

二枚炮破味辛熱去皮

白朮

二兩味甘溫

桂枝

四兩辛熱味辛熱去皮

桂枝甘草之辛甘發散風邪而固衛附子白朮之
辛甘解濕氣而溫經

右四味以水六升煮取三升去滓溫服一升日三服
初服得微汗則解能食汗出復煩者服五合恐一升

多者宜服六七合爲妙

傷寒脈浮滑此表有熱裏有寒白虎湯主之

浮爲在表滑爲在裏表有熱外有熱也裏有寒有邪氣傳裏也以邪未入府故止言寒如瓜蒂散證云胸上有寒者是矣與白虎湯以解內外之邪

白虎湯方

知母

六兩
苦寒
味

石膏

一斤碎
甘寒
味

甘草

二兩
甘平

粳米

六合
甘平
味

內經曰熱淫所勝佐以苦甘知母石膏之苦甘以散熱熱則傷氣甘以緩之甘草粳米之甘以益氣右四味以水一斗煮米熟湯成去滓溫服一升日三服

傷寒脈結代心動悸炙甘草湯主之

結代之脈動而中出能自還者名曰結不能自還者名曰代由血氣虛衰不能相續也心中悸動知真氣內虛也與炙甘草湯益虛補血氣而復脈

炙甘草湯方

甘草

四兩炙味甘平

生薑

三兩切味辛溫

桂枝

三兩去皮味辛熱

人參

二兩味甘溫

生地黃

一斤味甘寒

阿膠

二兩味溫甘

麥門冬

半升去心味甘平

麻子仁

半升味甘平

大棗

十二枚味甘溫

補可以去弱人參甘草大棗之甘以補不足之氣桂枝生薑之辛以益正氣聖濟經曰津耗散爲枯五藏痿弱榮衛涸流溫劑所以潤之麻人阿膠麥門冬地黃之甘潤經益血復脈通心也

右九味以清酒七升水八升先煮八味取三升去滓

內膠烊消盡溫服一升日三服一名復脈湯

脈按之來緩而時一止復來者名曰結又脈來動而中止更來小數中有還者反動名曰結陰也脈來動而中止不能自還因而復動名曰代陰也得此脈者必難治

結代之脈一爲邪氣留結一爲真氣虛衰脈來動而中止若能自還更來小數止是邪氣留結名曰結陰若動而中止不能自還因其呼吸陰陽相引復動者是真氣衰極名曰代陰爲難治之脈經曰脈結者生代者死此之謂也

釋音

俛

音免
於危切

瞤

目倫切
動也

匱

求位切
匣也

瘻

病也
於危切

柔

軟切
柔也

椎

音椎
椎也

掣切
倡列

涸乎各切

烊音羊

註解傷寒論卷第四

珍倣宋版印

註解傷寒論卷第五

漢張仲景著

晉王叔和撰次

宋成無己註

明汪濟川校正

辨陽明脈證并治第八

問曰病有太陽陽明有正陽陽明有少陽陽明何謂也答曰太陽陽明者脾約是也

陽明胃也邪自太陽經傳之入府者謂之太陽陽明經曰太陽病若吐若下若發汗後微煩小便數大便因鞶者與小承氣湯卽是太陽陽明脾約病也

正陽陽明者胃家實是也

邪自陽明經傳入府者謂之正陽陽明經曰陽明病脈遲雖汗出不惡寒其身必重短氣腹滿而喘

有潮熱者外欲解可攻裏也手足濺濺然汗出者此大便已鞭也大承氣湯主之卽是正陽陽明胃家實也

少陽陽明者發汗利小便已胃中燥煩實大便難是也

邪自少陽經傳之入府者謂之少陽陽明經曰傷寒脈弦細頭痛發熱者屬少陽少陽不可發汗發汗則讞語此屬胃卽是少陽陽明病也
陽明之爲病胃家實也

邪傳入胃熱毒留結則胃家爲實華陀曰熱毒入胃要須下去之不可留於胃中是知邪在陽明爲胃家實也

問曰何緣得陽明病答曰太陽病發汗若下若利小

便此亡津液胃中乾燥因轉屬陽明不更衣內實大便難者此名陽明也

本太陽病不解因汗利小便亡津液胃中乾燥太陽之邪入府轉屬陽明古人登廁必更衣不更衣者通爲不大便不更衣則胃中物不得泄故爲內實胃無津液加之畜熱大便則難爲陽明裏實也問曰陽明病外證云何答曰身熱汗自出不惡寒反惡熱也

陽明病爲邪入府也邪在表則身熱汗出而惡寒邪旣入府則表證已罷故不惡寒但身熱汗出而惡熱也

問曰病有得之一日不發熱而惡寒者何也答曰雖得之一日惡寒將自罷卽自汗出而惡熱也

邪客在陽明當發熱而不惡寒今得之一日猶不
發熱而惡寒者卽邪未全入府尙帶表邪若表邪
全入則更無惡寒必自汗出而惡熱也

問曰惡寒何故自罷答曰陽明居中土也萬物所歸
無所復傳始雖惡寒二日自止此爲陽明病也

胃爲水穀之海主養四旁四旁有病皆能傳入於
胃入胃則更不復傳如太陽傳之入胃則更不傳
陽明陽明病傳之入胃則更不傳少陽少陽病傳
之入胃則更不傳三陰

本太陽初得病時發其汗汗先出不徹因轉屬陽明
也

傷寒傳經者則一日太陽二日陽明此太陽傳經
故曰轉屬陽明

傷寒發熱無汗嘔不能食而反汙出濺濺然者是轉屬陽明也

傷寒發熱無汗嘔不能食者太陽受病也若反汙出濺濺然者太陽之邪轉屬陽明也經曰陽明病法多汗

傷寒三日陽明脈大

傷寒三日邪傳陽明之時經曰尺寸俱長者陽明受病當二三日發陽明氣血俱多又邪併於經是以脈大

傷寒脈浮而緩手足自溫者是爲繫在太陰太陰者身當發黃若小便自利者不能發黃至七八月大便鞶者爲陽明病也

浮爲陽邪緩爲脾脈傷寒脈浮緩太陰客熱邪在

三陽則手足熱邪在三陰則手足寒今手足自溫
是知繫在太陰也太陰土也爲邪蒸之則色見於
外當發身黃小便自利者熱不內畜不能發黃至
七八日大便鞭者卽太陰之邪入府轉屬陽明也
傷寒轉繫陽明者其人濶然微汗出也

傷寒則無汗陽明法多汗此以傷寒邪轉繫陽明
故濶然微汗出

陽明中風口苦咽乾腹滿微喘發熱惡寒脈浮而緊
若下之則腹滿小便難也

脈浮在表緊爲裏實陽明中風口苦咽乾腹滿微
喘者熱傳於裏也發熱惡寒者表仍未解也若下
之裏邪雖去表邪復入於裏又亡津液故使腹滿
而小便難

陽明病若能食名中風不能食名中寒

陽明病以飲食別受風寒者以胃爲水穀之海風爲陽邪陽殺穀故中風者能食寒爲陰邪陰邪不殺穀故傷寒者不能食

陽明病若中寒不能食小便不利手足濶然汗出此欲作固瘕必大便初鞭後溏所以然者以胃中冷水穀不別故也

陽明中寒不能食者寒不殺穀也小便不利者津液不化也陽明病法多汗則周身汗出此手足濶然而汗出而身無汗者陽明中寒也固瘕者寒氣結積也胃中寒甚欲留結而爲固瘕則津液不得通行而大便必鞢者若汗出小便不利者爲實也此以小便不利水穀不別雖大便初鞭後必溏也

陽明病欲食小便反不利大便自調其人骨節疼翕翕如有熱狀奄然發狂濶然汗出而解者此水不勝穀氣與汗共併脈緊則愈

陽病客熱初傳入胃胃熱則消穀而欲食陽明病熱爲實者則小便當數大便當輒今小便反不利大便自調者熱氣散漫不爲實也欲食則胃中穀多內經曰食入於陰長氣於陽穀多則陽氣勝熱消津液則水少經曰水入於經其血乃成水少則陰血弱金匱要略曰陰氣不通卽骨疼其人骨節疼者陰氣不足也熱甚於表者翕翕發熱熱甚於裏者蒸蒸發熱此熱氣散漫不專著於表裏故翕翕如有熱狀奄忽也忽然發狂者陰不勝陽也內經曰陰不勝其陽者則脈流薄疾并乃狂陽明蘊

熱爲實者須下之愈熱氣散漫不爲實者必待汗出而愈故云濶然而汗出解也水穀之等者陰陽氣平也水不勝穀氣是陰不勝陽也汗出則陽氣衰脈緊則陰氣生陰陽氣平兩無偏勝則愈故云與汗共併脈緊則愈

陽明病欲解時從申至戌上

四月爲陽土旺於申酉戌向王時是爲欲解陽明病不能食攻其熱必嘔所以然者胃中虛冷故也以其人本虛故攻其熱必嘔

不能食胃中本寒攻其熱復虛其胃虛寒相搏故令嘔也經曰關脈弱胃氣虛有熱不可大攻之熱去則寒起此之謂也

陽明病脈遲食難用飽飽則微煩頭眩必小便難此

欲作穀疸雖下之腹滿如故所以然者脈遲故也

陽明病脈遲則邪方入裏熱未爲實也食入於陰長氣於陽胃中有熱食難用飽飽則微煩而頭眩者穀氣與熱氣相搏也兩熱相合消搏津液必小便難利者不能發黃言熱得泄也小便不利則熱不得泄身必發黃疸黃也以其發於穀氣之熱故名穀疸熱實者下之則愈脈遲爲熱氣未實雖下之腹滿亦不減也經曰脈遲尙未可攻

陽明病法多汗反無汗其身如蟲行皮中狀者此以久虛故也

胃爲津液之府氣虛津液少病則反無汗胃候身之肌肉其身如蟲行皮中者知胃氣久虛也陽明病反無汗而小便利二三日嘔而欬手足厥者

必苦頭痛若不效不嘔手足不厥者頭不痛

陽明病法多汗反無汗而小便利者陽明傷寒而
寒氣內攻也至二三日嘔效而支厥者寒邪發於
外也必苦頭痛若不效不嘔手足不厥者是寒邪
但攻裏而不外發其頭亦不痛也

陽明病但頭眩不惡寒故能食而效其人必咽痛若
不效者咽不痛

陽明病身不重痛但頭眩而不惡寒者陽明中風
而風氣內攻也經曰陽明病若能食名中風風邪
攻胃胃氣上逆則效咽門者胃之系效甚則咽傷
故必咽痛若胃氣不逆則不效其咽亦不痛也

陽明病無汗小便不利心中懊惱者身必發黃

陽明病無汗而小便不利者熱蘊於內而不得越

心中懊惱者熱氣鬱蒸欲發於外而爲黃也

陽明病被火額上微汗出小便不利者必發黃

陽明病則爲內熱被火則火熱相合而甚若遍身汗出而小便利者熱得泄越不能發黃今額上微汗出而小便不利則熱不得越鬱蒸於胃必發黃也

陽明病脈浮而緊者必潮熱發作有時但浮者必盜

汗出

浮爲在經緊者裏實脈浮而緊者表熱裏實也必潮熱發作有時若脈但浮而不緊者止是表熱也必盜汗出盜汗者睡而汗出也陽明病裏熱者自

汗表熱者盜汗

陽明病口燥但欲漱水不欲嚥者此必劖

陽明之脈起於鼻絡於口陽明裏熱則渴欲飲水此口燥但欲漱水不欲嚥者是熱在經而裏無熱也陽明氣血俱多經中熱甚迫血妄行必作衄也陽明病本自汗出醫更重發汗病已差尙微煩不了了者此大便必鞢故也以亡津液胃中乾燥故令大便鞢當問其小便日幾行若本小便日三四行今日再行故知大便不久出今爲小便數少以津液當還入胃中故知不久必大便也

先亡津液使大便鞢小便數少津液分別大便必自下也

傷寒嘔多雖有陽明證不可攻之

嘔者熱在上焦未全入府故不可下

陽明病心下鞢滿者不可攻之攻之利遂不止者死

利止者愈

陽明病腹滿者爲邪氣入府可下之心下鞶滿則
邪氣尙淺未全入府不可便下之得利止者爲邪
氣去正氣安正氣安則愈若因下利不止者爲正
氣脫而死

陽明病面合赤色不可攻之必發熱色黃小便不利
也

合通也陽明病面色通赤者熱在經也不可下之
下之虛其胃氣耗其津液經中之熱乘虛入胃必
發熱色黃小便不利也

陽明病不吐不下心煩者可與調胃承氣湯
吐後心煩謂之內煩下後心煩謂之虛煩今陽明
病不吐不下心煩則是胃有鬱熱也與調胃承氣

湯以下鬱熱

陽明病脈遲雖汗出不惡寒者其身必重短氣腹滿而喘有潮熱者此外欲解可攻裏也手足濶然而汗出者此大便已鞭也大承氣湯主之若汗多微發熱惡寒者外未解也其熱不潮未可與承氣湯若腹大滿不通者可與小承氣湯微和胃氣勿令大泄下

陽明病脈遲若汗出多微發熱惡寒者表未解也若脈遲雖汗出而不惡寒者表證罷也身重短氣腹滿而喘有潮熱者熱入府也四肢諸陽之本津液足爲熱蒸之則周身汗出津液不足爲熱蒸之其手足濶然而汗出知大便已鞭也與大承氣湯以下胃熱經曰潮熱者實也其熱不潮是熱未成實故不可便與大承氣湯雖有腹大滿不通之急

亦不可與大承氣湯與小承氣湯微和胃氣

珍倣宋版印

大承氣湯方

大黃

四兩
寒酒洗苦

厚朴

半斤
炙去皮苦溫

枳實

五枚
寒炙苦

芒硝

三合
鹹寒

內經曰燥溼所勝以苦下之大黃枳實之苦以潤燥除熱又曰燥溼於內治以苦溫厚朴之苦下結燥又曰熱溼所勝治以鹹寒芒硝之鹹以攻蘊熱右四味以水一斗先煮二物取五升去滓內大黃煮取二升去滓內芒硝更上火微一兩沸分溫再服得

下餘勿服

小承氣湯方

大黃

四兩
寒酒洗苦

厚朴

二兩
去皮炙

枳實

三枚
者炙大

大熱結實者與大承氣湯小熱微結者與小承氣

湯以熱不大甚故於大承氣湯去芒硝又以結不至堅故不減厚朴枳實也

已上三味以水四升煮取一升二合去滓分溫二服初服湯當更衣不爾者盡飲之若更衣者勿服之陽明病潮熱大便微鞭者可與大承氣湯不鞭者不與之若不大便六七日恐有燥屎欲知之法少與小承氣湯湯入腹中轉矢氣者此有燥屎乃可攻之若不轉矢氣者此但初頭鞭後必溏不可攻之攻之必脹滿不能食也欲飲水者與水則噦其後發熱者必大便復鞭而少也以小承氣湯和之不轉矢氣者慎不可攻之

潮熱者實得大便微鞭者便可攻之若便不鞭者則熱未成實雖有潮熱亦未可攻若不大便六七

日恐有燥屎當先與小承氣湯躡之如有燥屎小承氣湯藥勢緩不能宣泄必轉氣下矢若不轉矢氣是胃中無燥屎但腸間少鞭爾止初頭鞭後必溏攻之則虛其胃氣致腹脹滿不能食也胃中乾燥則欲飲水水入胃中虛寒相搏氣逆則噦其後却發熱者則熱氣乘虛還復聚於胃中胃燥得熱必大便復鞭而少與小承氣湯微利與和之故以重云不轉矢氣不可攻內慎之至也

夫實則讞語虛則鄭聲鄭聲重語也

內經曰邪氣盛則實精氣奪則虛讞語由邪氣盛而神識昏也鄭聲由精氣奪而聲不全也讞語者言語不次也鄭聲者鄭音不正也論語云惡鄭聲之亂雅樂又曰放鄭聲遠佞人鄭聲淫佞人殆言

鄭聲不正也今新差氣虛人聲轉者是所謂重語者也若聲重亦聲轉之

直視讞語喘滿者死下利者亦死

直視讞語邪勝也喘滿爲氣上脫下利爲氣下脫是皆主死

發汗多若重發汗者亡其陽讞語脈短者死脈自和者不死

亡陽胃燥讞語者脈短津液已絕不可復治脈自和爲正氣未衰而猶可生也

傷寒若吐若下後不解不大便五六日上至十餘日日晡所發潮熱不惡寒獨語如見鬼狀若劇者發則不識人循衣摸牀惕而不安微喘直視脈弦者生濇者死微者但發熱讞語者大承氣湯主之若一服利

止後服

若吐若下皆傷胃氣不大便五六日上至十餘日者亡津液胃氣虛邪熱內結也陽明王於申酉戌日晡所發潮熱熱者陽明熱甚也不惡寒者表證罷也獨語如見鬼狀者陽明內實也以爲熱氣有餘若劇者是熱氣甚大也熱大甚於內昏冒正氣使不識人至於循衣摸牀惕而不安微喘直視傷寒陽勝而陰絕者死陰勝而陽絕者死熱劇者爲陽勝脈弦爲陰有餘澀爲陰不足陽熱雖劇脈弦知陰未絕而猶可生脈澀則絕陰故不可治其邪熱微而未至於劇者但發熱讏語可與大承氣湯以下胃中熱經曰凡服下藥中病卽止不必盡劑此以熱未劇故云若一服利則止後服

陽明病其人多汗以津液外出胃中燥大便必鞶鞶
則讞語小承氣湯主之若一服讞語止更莫復服
亡津液胃燥大便鞶而讞語雖無大熱內結亦須
與小承氣湯和其胃氣得一服讞語止則胃燥以
潤更莫復與承氣湯以本無實熱故也

陽明病讞語發潮熱脈滑而疾者小承氣湯主之因
與承氣湯一升腹中轉矢氣者更服一升若不轉矢
氣勿更與之明日不大便脈反微澀者裏虛也爲難
治不可更與承氣湯也

陽明病讞語發潮熱若脈沉實者內實者也則可
下若脈滑疾爲裏熱未實則未可下先與小承氣
湯和之湯入腹中得矢氣者中有燥屎可更與小
承氣湯一升以除之若不轉矢氣者是無燥屎不

可更與小承氣湯至明日邪氣傳時脈得沉實緊牢之類是裏實也反得微澀者裏氣大虛也若大便利後脈微澀者止爲裏虛而猶可此不會大便脈反微澀是正氣內衰爲邪氣所勝故云難治陽明病讖語有潮熱反不能食者胃中必有燥屎五六枚也若能食者但鞶亦宜大承氣湯下之

讖語潮熱爲胃熱當消穀引食反不能食者胃中有燥屎而胃中實也若能食者胃中虛熱雖鞶不得爲有燥屎雜病虛爲不欲食實爲欲食傷寒則胃實熱甚者不能食胃中虛熱甚者能食與雜病爲異也大承氣湯以下燥屎逐結熱

陽明病下血讖語者此爲熱入血室但頭汗出者刺期門隨其實而瀉之濶然汗出則愈

陽明病熱入血室迫使血下行使下血讞語陽明病法多汗以奪血者無汗故但頭汗出也刺期門以散血室之熱隨其實而瀉之以除陽明之邪熱散邪除熱榮衛得通津液得復濶然汗出而解

汗出讞語者以有燥屎在胃中此爲風也須下之過經乃可下之下之若早語言必亂以表虛裏實故也下之則愈宜大承氣湯

胃中有燥屎則讞語以汗出爲表未罷故云風也燥屎在胃則當下以表未和則未可下須過太陽經無表證乃可下之若下之早燥屎雖除則表邪乘虛復陷於裏爲表虛裏實胃虛熱甚語言必亂與大承氣湯却下胃中邪熱則止

傷寒四五日脈沈而喘滿沈爲在裏而反發其汗津

液越出大便爲難表虛裏實久則讞語

邪氣入內之時得脈沈而喘滿裏證具也則當下之反發其汗令津液越出胃中乾燥大便必難久則屎燥胃實必發讞語

三陽合病腹滿身重難以轉側口不仁而面垢讞語遺尿發汗則讞語下之則額上生汗手足逆冷若自汗出者白虎湯主之

腹滿身重難以反側口不仁讞語者陽明也鍼經曰少陽病甚則面微塵此面垢者少陽也遺尿者太陽也三者以陽明證多故出陽明篇中三陽合病爲表裏有邪若發汗攻表則燥熱益甚必愈讞語若下之攻裏表熱乘虛內陷必額上汗出手足逆冷其自汗出者三陽經熱甚也內經曰熱則腠

理開榮衛通汗大泄與白虎湯以解內外之熱
二陽併病太陽證罷但發潮熱手足熱熱汗出大便
難而讞語者下之則愈宜大承氣湯

本太陽病併於陽明名曰併病太陽證罷是無表
證但發潮熱是熱併陽明一身汗出爲熱越今手
足熱熱汗出是熱聚於胃也必大便難而讞語經
曰手足熱然而汗出者必大便已鞭也與大承氣
湯以下胃中實熱

陽明病脈浮而緊咽燥口苦腹滿而喘發熱汗出不
惡寒反惡熱身重若發汗則燥心憤憤反讞語若加
燒鍼必怵惕煩燥不得眠若下之則胃中空虛客氣
動膈心中懊惱舌上胎者梔子豉湯主之

脈浮發熱爲邪在表咽燥口苦爲熱在經脈緊腹

滿而喘汗出不惡寒反惡熱身重爲邪在裏此表裏俱有邪猶當雙解之若發汗攻表表熱雖除而內熱益甚故燥而憤憤反讞語憤憤者心亂經曰榮氣微者加燒鍼則血不行更發熱而躁煩此表裏有熱若加燒鍼則損動陰氣故怵惕煩燥不得眠也若下之裏熱雖去則胃中空虛表中客邪之氣乘虛陷於上焦煩動於膈使心中懊惱而不了了也舌上胎黃者熱氣客於胃中舌上胎白知熱氣客於胸中與梔子豉湯以吐胸中之邪

若渴欲飲水口乾舌燥者白虎加人參湯主之

若下後邪熱客於上焦者爲虛煩此下後邪熱不客於上焦而客於中焦者是爲乾燥煩渴與白虎加人參湯散熱潤燥

若脈浮發熱渴欲飲水小便不利者猪苓湯主之
此下後客熱客於下焦者也邪氣自表入裏客於
下焦三焦俱帶熱也脈浮發熱者上焦熱也渴欲
飲水者中焦熱也小便不利者邪客下焦津液不
得下通也與猪苓湯利小便以瀉下焦之熱也

猪苓湯方

猪苓

去皮甘平

茯苓

甘平

阿膠

甘平

滑石

碎甘寒

澤瀉

各一兩甘鹹寒

甘甚而反淡淡味滲泄爲陽猪苓茯苓之甘以行
小便鹹味湧泄爲陰澤瀉之鹹以泄伏水滑利竅
阿膠滑石之滑以利水道

右伍味以水四升先煮四味取二升去滓內下阿膠
烊消溫服七合日三服

陽明病汗出多而渴者不可與猪苓湯以汗多胃中燥猪苓湯復利其小便故也

鍼經曰水穀入於口輸於腸胃其液別爲五天寒衣薄則爲溺天熱衣厚則爲汗是汗溺一液也汗多爲津液外泄胃中乾燥故不可與猪苓湯利小便也

脈浮而遲表熱裏寒下利清穀者四逆湯主之
浮爲表熱遲爲裏寒下利清穀者裏寒甚也與四逆湯溫裏散寒

若胃中虛冷不能食者飲水則噦

噦者效逆是也千金曰咳逆者噦逆之名胃中虛冷得水則水寒相搏胃氣逆而噦

脈浮發熱口乾鼻燥能食者則劖

脈浮發熱口乾鼻燥者熱在經也能食者裏和也
熱甚於經迫血爲劔胃中虛冷陰勝也水入於經
其血乃成飲水者助陰氣逆爲嘯發熱口乾陽勝
也食入於陰長氣於陽能食者助陽血妄爲劔三
者偏陰偏陽之疾也

陽明病下之其外有熱手足溫不結胸心中懊憹飢
不能食但頭汗出者梔子豉湯主之

表未罷而下者應邪熱內陷也熱內陷者則外熱
而無手足寒今外有熱而手足溫者熱雖內陷然
而不深故不作結胸也心中懊憹飢不能食者熱
客胸中爲虛煩也熱自胸中薰蒸於上故但頭汗
出而身無汗與梔子豉湯以吐胸中之虛煩

陽明病發潮熱大便溏小便自可胸脇滿不去者小

柴胡湯主之

陽明病潮熱爲胃實大便鞭而小便數今大便溏
小便自可則胃熱未實而水穀不別也大便溏者
應氣降而胸脇滿去今反不去者邪氣猶在半表
半裏之間與小柴胡湯以去表裏之邪

陽明病脇下鞭滿不大便而嘔舌上白胎者可與小
柴胡湯上焦得通津液得下胃氣因和身濺然而汗
出解也

陽明病腹滿不大便舌上胎黃者爲邪熱入府可
下若脇下鞭滿雖不大便而嘔舌上白胎者爲邪
未入府在表裏之間與小柴胡湯以和解之上焦
得通則嘔止津液得下則胃氣因和汗出而解

陽明中風脈弦浮大而短氣腹都滿脇下及心痛久

按之氣不通鼻乾不得汗嗜臥一身及面目悉黃小便難有潮熱時時噦耳前後腫刺之小差外不解病過十日脈續浮者與小柴胡湯脈但浮無餘證者與麻黃湯若不尿腹滿加噦者不治

浮大爲陽風在表也弦則爲陰風在裏也短氣腹滿脇下及心痛風熱壅於腹中而不通也若寒客於內而痛者按之則寒氣散而痛止此以風熱內壅故雖久按而氣亦不通陽明病鼻乾不得臥自汗出者邪在表也此鼻乾不得汗而嗜臥者風熱內攻不干表也一身面目悉黃小便難有潮熱時時噦者風熱攻於胃也陽明之脈出大迎循頰車上耳前過客主人熱勝則腫此風熱在經故耳前後腫刺之經氣通腫則小差如此者外證罷則可

攻若外證不解雖過十日脈續浮者邪氣猶在半表半裏與小柴胡湯以和解之若其脈但浮而不弦大無諸裏證者是邪但在表也可與麻黃湯以發其汗若不尿腹滿加嘔者關格之疾也故云不治難經曰關格者不得盡其命而死

陽明病自汗出若發汗小便自利者此爲津液內竭雖硬不可攻之當須自欲大便宜蜜煎導而通之若土瓜根及與大猪膽汁皆可爲導

津液內竭腸胃乾燥大便因硬此非結熱故不可攻宜以藥外治而導引之

蜜煎導方

蜜七合一味內銅器中微火煎之稍凝似飴狀攬之勿令焦著欲可丸併手捻作挺令頭銳大如指

長二寸許當熱時急作冷則硬以內穀道中以手急抱欲大便時乃去之

猪膽汁方

大猪膽一枚瀉汁和醋少許以灌穀道中如一食頃當大便出

陽明病脈遲汗出多微惡寒者表未解也可發汗宜桂枝湯

陽明病脈遲汗出多當責邪在裏以微惡寒知表未解與桂枝湯和表

陽明病脈浮無汗而喘者發汗則愈宜麻黃湯

陽明傷寒表實脈浮無汗而喘也與麻黃湯以發

汗

陽明病發熱汗出此爲熱越不能發黃也但頭汗出

身無汗劑頸而還小便不利渴引水漿者此爲瘀熱
在裏身必發黃茵陳湯主之

但頭汗出身無汗劑頸而還者熱不得越也小便
不利渴引水漿者熱甚於胃津液內竭也胃爲土
而色黃胃爲熱蒸則色奪於外必發黃也與茵陳
湯逐熱退黃

茵陳蒿湯方

茵陳蒿六兩
微寒
苦 桀子十四枚
擘
苦
寒 大黃二兩
去皮
苦
寒

小熱之氣涼以和之大熱之氣寒以取之茵陳梔
子之苦寒以逐胃燥宜下必以苦宜補必以酸大
黃之苦寒以下瘀熱

右三味以水一斗先煮茵陳減六升內二味煮取三
升去滓分溫三服小便當利尿如皂角汁狀色正赤

一宿腹減黃從小便去也

陽明證其人喜忘者必有畜血所以然者本有久瘀血故令喜忘屎雖鞭大便反易其色必黑宜抵當湯下之

內經曰血并於下亂而喜忘此下本有久瘀血所以喜忘也津液少大便鞭以畜血在內屎雖鞭大便反易其色黑也與抵當湯以下瘀血

陽明病下之心中懊惱而煩胃中有燥屎者可攻腹微滿初頭鞭後必溏不可攻之若有燥屎者宜大承氣湯

下後心中懊惱而煩者虛煩也當與梔子豉湯若胃中有燥屎者非虛煩也可與大承氣湯下之其腹微滿初鞭後溏是無燥屎此熱不在胃而在上

也故不可攻

病人不大便五六日繞脅痛煩燥發作有時者此有
燥屎故使不大便也

不大便五六日者則大便必結爲燥屎也胃中燥
實氣不得下通故繞脅痛煩燥發作有時也

病人煩熱汗出則解又如瘧狀日晡所發熱者屬陽
明也脈實者宜下之脈浮虛者宜發汗下之與大承
氣湯發汗宜桂枝湯

雖得陽明證未可便爲裏實審看脈候以別內外
其脈實者熱已入府爲實可與大承氣湯下之其
脈浮虛者是熱未入府猶在表也可與桂枝湯發
汗則愈

大下後六七日不大便煩不解腹滿痛者此有燥屎

也所以然者本有宿食故也宜大承氣湯

大下之後則胃弱不能消穀至六七日不大便則宿食已結不消故使煩熱不解而腹滿痛是知有燥屎也與大承氣湯以下除之

病人小便不利大便乍難乍易時有微熱喘冒不能臥者有燥屎也宜大承氣湯

小便利則大便輒此以有燥屎故小便不利而大便乍難乍易胃熱者發熱喘冒無時及嗜臥也此燥屎在胃故時有微熱喘冒不得臥也與大承氣湯以下燥屎

食穀欲嘔者屬陽明也吳茱萸湯主之得湯反劇者屬上焦也

上焦主內胃爲之市食穀欲嘔者胃不受也與吳

茱萸湯以溫胃氣得湯反劇者上焦不內也以治
上焦法治之

吳茱萸湯方

吳茱萸

一升洗
辛熱

人參三兩

甘溫

生薑六兩

辛溫

切

大棗十

擘甘枝

內經曰寒淫於內治以甘熱佐以苦辛吳茱萸生姜之辛以溫胃人參大棗之甘以緩脾

右四味以水七升煮取二升去滓溫服七合日三服太陽病寸緩關浮尺弱其人發熱汗出復惡寒不嘔但心下痞者此以醫下之也如其不下者病人不惡寒而渴者此轉屬陽明也小便數者大便必鞕不更衣十日無所苦也渴欲飲水少少與之但以法救之渴者宜五苓散

太陽病脈陽浮陰弱爲邪在表今寸緩關浮尺弱
邪氣漸傳裏則發熱汗出復惡寒者表未解也傳
經之邪入裏裏不和者必嘔此不嘔但心下痞者
醫下之早邪氣留於心下也如其不下者必漸不
惡寒而渴太陽之邪轉屬陽明也若吐若下若發
汗後小便數大便鞢者當與小承氣湯和之此不
因吐下發汗後小便數大便鞢若是無滿實雖不
更衣十日無所苦也候津液還入胃中小便數少
大便必自出也渴欲飲水者少少與之以潤胃氣
但審邪氣所在以法救之如渴不止與五苓散是
也

脈陽微而汗出少者爲自和也汗出多者爲太過

脈陽微者邪氣少汗出少者爲適當故自和汗出

多者反損正氣是汗出太過也

陽脈實因發其汗出多者亦爲太過太過爲陽絕於裏亡津液大便因鞭也

陽脈實者表熱甚也因發汗熱乘虛蒸津液外泄致汗出太過汗出多者亡其陽陽絕於裏腸胃乾燥大便因鞭也

脈浮而芤浮爲陽芤爲陰浮芤相搏胃氣生熱其陽則絕

浮芤相搏陰陽不諧胃氣獨治鬱而生熱消燬津液其陽爲絕

趺陽脈浮而濇浮則胃氣強澀則小便數浮澀相搏大便則難其脾爲約麻仁丸主之

趺陽者脾胃之脈診浮爲陽知胃氣強澀爲陰知

脾爲約約者儉約之約又約束之約內經曰飲入於胃游溢精氣上輸於脾脾氣散精上歸於肺通調水道下輸於膀胱水精四布五經並行是脾主爲胃行其津液者也今胃強脾弱約束津液不得四布但輸膀胱致小便數大便難與脾約丸通腸潤燥

麻仁丸方

麻子仁

二升
甘平

芍藥

半斤
酸平

枳實

半斤
苦寒
炙去

大黃

一斤
皮苦寒
去

厚朴

一斤
皮苦寒
炙去

杏仁

別作脂甘溫
一斤
去皮尖熬

內經曰脾欲緩急食甘以緩之麻子杏仁之甘緩脾而潤燥津液不足以酸收之芍藥之酸以斂津液腸燥胃強以苦泄之枳實厚朴大黃之苦下燥

結而泄胃強也

右六味爲末煉蜜爲丸桐子大飲服十九日三服漸
加以和爲度

太陽病三日發汗不解蒸蒸發熱者屬胃也調胃承
氣湯主之

蒸蒸者如熱薰蒸言甚熱也太陽病三日發汗不
解則表邪已罷蒸蒸發熱胃熱爲甚與調胃承氣
湯下胃熱

傷寒吐後腹脹滿者與調胃承氣湯

內經曰諸脹腹大皆屬於熱熱在上焦則吐吐後
不解復腹脹滿者邪熱入胃也與調胃承氣湯下
其胃熱

太陽病若吐若下若發汗微煩小便數大便因鞶者

與小承氣湯和之愈

吐下發汗皆損津液表邪乘虛傳裏大煩者邪在表也微煩者邪入裏也小便數大便因鞭者其脾爲約也小承氣湯和之愈

得病二三日脈弱無太陽柴胡證煩燥心下鞭至四五日雖能食以小承氣湯少少與微和之令小安至六日與承氣湯一升若不大便六七日小便少者雖不能食但初頭鞭後必溏未定成鞭攻之必溏須小便利屎定鞭乃可攻之宜大承氣湯

針經曰脈軟者病將下弱爲陰脈當責邪在裏得病二三日脈弱是日數雖淺而邪氣已入裏也無太陽證爲表證已罷無柴胡證爲無半表半裏之證煩燥心下鞭者邪氣內甚也胃實熱甚則不能

食胃虛熱甚至四五日雖能食亦當與小承氣湯
微和之至六日則熱甚與大承氣湯一升若不大
便六七日小便多者爲津液內竭大便必鞢則可
下之小便少者則胃中水穀不別必初鞢後溏雖
不能食爲胃實以小便少則未定成鞢亦不可攻
須小便利屎定鞢乃可攻之

傷寒六七日目中不了了睛不和無表裏證大便難
身微熱者此爲實也急下之宜大承氣湯

內經曰諸脈者皆屬於目傷寒六七日邪氣入裏
之時目中不了了睛不和者邪熱內甚上熏於目
也無表裏證大便難者裏實也身大熱者表熱也
身微熱者裏熱也針經曰熱病目不明熱不已者
死此目中不了了睛不和則證近危惡也須急與

大承氣湯下之

陽明發熱汗多者急下之宜大承氣湯

邪熱入府外發熱汗多者熱迫津液將竭急與大承氣湯以下其府熱

發汗不解腹滿痛者急下之宜大承氣湯

發汗不解邪熱傳入府而成腹滿痛者傳之迅也是須急下之

腹滿不減減不足言當下之宜大承氣湯

腹滿不減邪氣實也經曰大滿大實自可除下之大承氣湯下其滿實若腹滿時減非內實也則不可下金匱要略曰腹滿時減復如故此爲寒當與溫藥是減不足言也

陽明少陽合病必下利其脈不負者順也負者失也

互相剋賊名爲負也脈滑而數者有宿食也當下之宜大承氣湯

陽明土少陽木二經合病氣不相和則必下利少陽脈不勝陽明不負是不相剋爲順也若少陽脈勝陽明脈負者是鬼賊相剋爲正氣失也脈經曰脈滑者爲病食也又曰滑數則胃氣實不利者脈當微厥冷脈滑數知胃有宿食與大承氣湯以下除之

病人無表裏證發熱七八日雖脈浮數者可下之假令已下脈數不解合熱則消穀善飢至六七日不大便者有瘀血宜抵當湯

七八日邪入府之時病人無表裏證但發熱雖脈浮數亦可與大承氣湯下之浮爲熱客於氣數爲

熱客於血下之邪熱去而浮數之脈俱當解若下後數脈去而脈但浮則是榮血間熱併於衛氣間也當爲邪氣獨留心中則飢邪熱不殺穀潮熱發渴之證此下之後浮脈去而數不解則是衛氣間熱合於榮血間也熱氣合併迫血下行胃虛協熱消穀善飢血至下焦若大便利者下血乃愈若六七日不大便則血不得行畜積於下爲瘀血與抵當湯以下去之

若脈數不解而下不止必協熱而便膿血也

下後脈數不解而不大便者是熱不得泄畜血於下爲瘀血也若下後脈數不解而下利不止者爲熱得下泄迫血下行必便膿血

傷寒發汗已身目爲黃所以然者以寒濕在裏不解

故也以爲不可下也於寒濕中求之

金匱要略曰黃家所起從濕得之汗出熱去則不能發黃發汗已身目爲黃者風氣去濕氣在也脾惡濕濕氣內著脾色外奪者身目爲黃若瘀血在裏發黃者則可下此以寒濕在裏故不可下當從寒濕法治之

傷寒七八日身黃如橘子色小便不利腹微滿者茵陳蒿湯主之

當熱甚之時身黃如橘子色是熱毒發泄於外內經曰膀胱者津液藏焉氣化則能出小便不利小腹滿者熱氣甚於外而津液不得下行也與茵陳湯利小便退黃逐熱

傷寒身黃發熱者梔子蘖皮湯主之

傷寒身黃胃有瘀熱當須下去之此以發熱爲熱
未實與梔子蘖皮湯解散之

梔子蘖皮湯方

梔子

一箇十五
甘苦寒

甘草

一兩
甘平

黃蘖

二兩
甘平

右三味以水四升煮取一升半去滓分溫再服

傷寒瘀熱在裏身必發黃麻黃連軺赤小豆湯主之
濕熱相交民多病癰癰黃也傷寒爲寒濕在表發
黃爲瘀熱在裏與麻黃連軺赤小豆湯除熱散濕

麻黃連軺赤小豆湯方

麻黃

二兩
溫去節

赤小豆

一升
甘平

連軺

二兩
根也苦寒

杏仁

四十箇
溫去皮尖甘

大棗

廿二枚
溫

生梓白皮

一升
苦寒

生薑

二兩
溫切辛

甘草

二兩
甘平

內經曰濕上甚而熱治以甘溫佐以甘平以汗爲

故正此之謂也又煎用潦水者亦取其水味薄則不助濕氣

已上八味以潦水一斗先煮麻黃再沸去上沫內諸藥煮取三升分溫三服半日服盡

辨少陽病脈證并治第九

少陽之病口苦咽乾目眩也

足少陽膽經也內經曰有病口苦者名曰膽癰甲乙經曰膽者中精之府五藏取決於膽咽爲之使少陽之脈起於目銳皆少陽受邪故口苦咽乾目眩

眩

少陽中風兩耳無所聞目赤胸中滿而煩者不可吐下吐下則悸而驚

少陽之脈起於目眚走於耳中其支者下胸中貫

膈風傷氣風則爲熱少陽中風氣壅而熱故耳聾
目赤胸滿而煩邪在少陽爲半表半裏以吐除煩
吐則傷氣氣虛者悸以下除滿下則亡血血虛者
驚

傷寒脈弦細頭痛發熱者屬少陽少陽不可發汗發
汗則讞語此屬胃胃和則愈胃不和則煩而悸

經曰三部俱弦者少陽受病脈細者邪漸傳裏雖
頭痛發熱爲表未解以邪客少陽爲半在表半在
裏則不可發汗發汗亡津液胃中乾燥少陽之邪
因傳入胃必發讞語當與調胃承氣湯下之胃和
則愈不下則胃爲少陽木邪干之故煩而悸

本太陽病不解轉入少陽者脇下鞭滿乾嘔不能食
往來寒熱尚未吐下脈沉緊者與小柴胡湯

太陽轉入少陽是表邪入於裏脇下鞭滿不能食
往來寒熱者邪在半表半裏之間若已經吐下脈
沉緊者邪氣入府爲裏實尚未可吐下而脈沉緊
爲傳裏雖深未全入府外猶未解也與小柴胡湯
以和解之

若已吐下發汗溫鍼讞語柴胡湯證罷此爲壞病知
犯何逆以法治之

少陽之邪在表裏之間若妄吐下發汗溫鍼損耗
津液胃中乾燥木邪干胃必發讞語若柴胡證不
罷者則不爲逆柴胡證罷者壞病也詳其因何治
之逆以法救之

三陽合病脈浮大上關上但欲眠睡目合則汗
關脈以候少陽之氣太陽之脈浮陽明之脈大脈

浮大上關上知三陽合病膽熱則睡少陰病但欲
眠睡目合則無汗以陰不得有汗但欲眠睡目合
則汗知三陽合病膽有熱也

傷寒六七日無大熱其人燥煩者此爲陽去入陰故
也

表爲陽裏爲陰邪在表則外有熱六七日邪氣入
裏之時外無大熱內有燥煩者表邪傳裏也故曰
陽去入陰

傷寒三日三陽爲盡三陰當受邪其人反能食而不
嘔此爲三陰不受邪也

傷寒四日表邪傳裏裏不和則不能食而嘔今反
能食而不嘔是邪不傳陰但在陽也

傷寒三日少陽脈小者欲已也

內經曰大則邪至小則平傷寒三日邪傳少陽脈當弦緊今脈小者邪氣微而欲已也

少陽病欲解時從寅至辰上

內經曰陽中之少陽通於春氣寅卯辰少陽木王之時

釋音

廁

初吏切
圃溷也

瘕

中音假腹
心亂對也

瘕

音日
久病

瘴

丁賀切
勞病也

憇

勑律切
心亂也

惕

又音踢
憂懼也